

Parlamentarci će ili otvoriti ili zatvoriti put do Evrope

Visoki predstavnik, Christian Schwarz-Schilling, izjavio je danas pred nastavak sjednice Zastupničkog doma Parlamentarne skupštine BiH da "potreba modificiranja Ustava BiH da bi se ova zemlja bolje pripremila za ispunjenje uslova evropskih integracija i da bi bolje služila svojim građanima neće nestati: izbor sa kojim se suočavaju parlamentarci BiH jeste da krenu naprijed sada ili da odlože svaki pomak za još četiri godine. Razočaran sam što nisu iskoristili priliku da to urade sinoć".

Visoki predstavnik je rekao da zastupnici u Zastupničkom domu moraju sebi postaviti jednostavno pitanje: "Može li BiH sebi dozvoliti još jedno odlaganje"? Ako se ovo danas ne prihvati, ostatak međunarodne zajednice će se upitati: "Zašto BiH ne želi da krene naprijed"?

"Ovaj sporazum je važan korak prema većoj funkcionalnosti države BiH", izjavio je visoki predstavnik, "ali to je samo prvi korak. Ustavna reforma je proces, a ne događaj. Postojat će i Faza II, ali ne bez uspješno završene Faze I".

Predloženim promjenama će se pomoći BiH da se bolje pripremi za integraciju u EU, što zahtijeva efikasno usvajanje i provedbu velikog broja zakona. BiH također treba efikasniju i uspješniju vlast kako bi ubrzala tempo reformi, posebno u ekonomskom sektoru.

"Sposobnost donošenja teških odluka znak je političke zrelosti, i tokom mojih sastanaka u Briselu bilo je jasno da EU posmatra da li BiH ovdje može naćiniti pomak ili ne. Izostanak tih pomaka uputit će veoma negativan signal međunarodnoj zajednici, kao i građanima Bosne i Hercegovine", rekao je visoki predstavnik.